

AVP a introduci era di politica di spirito

ORANJESTAD(AAN) No por pasa algo na Hulanda cu e entreguistanan di AVP mester copia esaki na Aruba tambe pasobra pa tanto experto cu nan ta, nan no por bin cu nada di nan mes.

Henny Eman su partido AVP a introduci e era nobo di politica di spirito na Aruba pasobra mescos cu Voorhoeven, Estado Hulandes, Consejo di Ministro di Reino, Gobernador etc etc no ta instancianan o personanan cu por ser teni responsabel pa nan actonan y nan maneho, mescos ta e caso cu AVP su ministronan y nan maneho gubernamental na Aruba.

Ministro di husticia Watty Vos no ta ministro pasobra e tin un KB riba su cabez y pesey e no por ser teni responsabel pa su actonan.

Vos a bin cu e lema "Husticia ta labora pa pueblo descansa" cual lema a resulta den lo contrario pasobra mientras cu pueblo ta kere cu e por descansar, criminalnan ta labora na grandi pa aumenta criminalidad na Aruba.

Por tene Watty Responsabel pa e maneho policial na Aruba?

NO, pasobra e no tin nada di bisa debi cu Hulanda ta dicta riba su cabez y esaki Hulanda a demostra bon cla ora cu nan a kita Seguridad Nacional di Watty y tambe ora cu Hulanda a pone pia abao cu na Aruba, Ministro Vos y su colega entreguista number uno Henny, mester core cu Rasmijn y Zaandam.

Cuerpo Policial ta pasando den e periodo mas malo desde su existencia y por tene Watty responsabel pa esey cu ni papel di wc e no por cumpra pa polis?

No, pasobra ministro Vos tambe ta un ministro fantasma cu no por haci nada otro cu corta sinta na rotonde vierkant y cada biaha cu DOW pone 100 meter di asfalt para saca foto pa pone den corant y por lo resto durante henter su periodo di gobernacion, e tabata mas den exterior cu e tabata na Aruba y asina convirtiendo su mes den un ministro spirito.

Mito Croes tambe a converti su mes den un ministro spirito pasobra ora cu e bin Aruba y e dal drinks y e no sa con pa yega su cas, ta polis mester hibe su cas pa e siguiente dia su partido AVP

declara publicamente, cu e auto di Mito e "Mitomobiel" a daña y a ser hiba na e garashi fantasma di DOW cu e tempo ey ya pa dos aña no tabata existi mas.

Den Consejo di Ministro di Reino tambe Mito tabata actua manera un spirito pasobra Henny tabata guia mente y decisionnan di Mito via e ondanan supernatural di Yomanda pa asina laga Mito hisa dede y vota cada biaha pa sigui entrega autonomia y derechonan di e pueblo di Aruba.

Ministro Manchi Engelbrecht ta otro ministro fantasma cu tambe ta bisa cosnan supernatural pasobra caha di gobierno ta blo bashi y e ministro fantasma aki ta bisa cu gobierno no tin problema financiero, pero un problema di "liquidez".

Manchi ta wak placa fantasma den su baul spiritual cu e tin den departamento di finanzas caminda e mes a hinca un batayon di technische bijstandernan Hulandes cu si a para bira un problema di Liquidez pa pais Aruba.

Via bola di cristal, e ministro fantasma aki ta hinca su presupuesto balansa den otro pasobra den mundo di fantasma so tur cos ta posibel.

Ministro Eddy Croes ta otro fantasma cu ta wak un mercado laboral yena cu Arubianonan cu trabao, mientras cu dia tras dia mas Arubiano ta perde trabao.

Ministro spirito Eddy Croes no ta wak cu na schoolnan local no tin material y suficiente fondonan pa educa nos muchanan, pero si e ta wak e futuro briyante di un school Hulandes cu a ser lanta pa muestra bon cla cu personal Arubiano cu ta traha na schoolnan na Aruba no ta sirbi.

Ministro Tico Croes ta blo wak spiritonan den turismo pasobra e ta bisa cu miles y miles di turista a bishita Aruba, pero na aeropuerto te awe nan no a wak turistanan bibo na e gran cantidad cu Tico ta papia di dje.

E economia di fantasma ta otro manera spiritual di bisa cu economia di Aruba ta bon siendo cu negoshi tras di ne-

goshi ta serando nan portanan pasobra ni cliente fantasma ta bin cumpra.

Comercio te awe ta sinta warda riba e placa fantasma cu e gobierno di AVP tin cu paga comercio y manera cu cos ta pinta, comercio por bien dobla warda pasobra no tin banco di spirito ainda na Aruba, aunke cu Banco Central no ta mucho leu den converti su mes den un spookhuis.

Henny a kere cu e por a bay haci algo den un caso hudicial na Merca y ata Hulanda su ministro di Asuntonan Exterior ta core tik Henny riba su dedenan y traha un decreto cu for di e momento cu Henny a pega barco, Hulanda ta dicidi tur loke tin di haber cu asuntonan exterior di Aruba y ta Hulanda ta determina con ta trata casonan di Arubianonan den exterior.

Asina Henny riba e tereno

di relacionnan exterior tambe a bira ministro fantasma pasobra ta ministro Van Mierlo di Hulanda mester papia pa Aruba

Aparentemente e spirito bibo di Spartaco Ghini keto bay ta coriendo tras di Henny y Henny na su turno ta core sconde bao di saya di Voorhoeven cu lo mester a priminti un futuro fantasma na Henny pasobra realidad di bida pa Henny y su partido AVP ta muestra hopi amargo.

Ministronan di OLA tambe a cuminsa wak spirito tur caminda pasobra ata OLA kier bolbe sinta den gobierno cu entreguistanan cu a hiba e maneho di yo no fui y manera spiritonan cu no por ser teni responsable pa nan actonan di traicion contra pais Aruba.

Ta con OLA por bay sinta cu fantasmanan den gobernacion?



Telefonnan di DIARIO
826747 - Fax 828551

NO WAY TO SANICOLAS!!

